



Anwar yakin rakyat terus menyumbang kepada ekonomi

Daripada Veena Rusli - Januari 24, 2023 @ 11:00pm
veena@bh.com.my

BANDAR SERI BEGAWAN: Datuk Seri Anwar Ibrahim yakin rakyat Malaysia akan terus menyumbang terhadap pertumbuhan ekonomi negara, walaupun berada di perantauan.

Perdana Menteri berkata, konsep Malaysia MADANI yang menjadi teras pentadbirannya menjadi bukti keterangkuman peranan semua lapisan masyarakat tanpa prasangka.

"Saya ingin memulakan tradisi baharu yang asasnya ialah perpaduan. Slogan sahaja tidak meyakinkan kerana apa yang lebih utama ialah memaknai konsep itu dengan penghayatan dan amalan.

"Kebenaran, keadilan, perpaduan, kemanusiaan, ihsan dan rahmah itu konsep yang memukau tetapi ujian sebenar ialah pelaksanaannya.

"Negara dan tamadun boleh terangkat dengan idealisme dan disiplin, namun ia juga boleh runtuh dengan kesenjangan dan rasuah," katanya berucap pada majlis makan malam bersama diaspora Malaysia di Suruhanjaya Tinggi Malaysia di sini, malam ini.

Hadir sama, isteri beliau, Datin Seri Dr Wan Azizah Wan Ismail.

Turut hadir, Premier Sarawak, Tan Sri Abang Johari Openg; Ketua Menteri Sabah, Datuk Seri Hajiji Noor; Menteri Luar, Datuk Seri Dr Zambry Abdul Kadir; dan Pesuruhjaya Tinggi Malaysia ke Brunei, Datuk Raja Reza Raja Zaib Shah.

Majlis berkenaan dihadiri lebih 400 rakyat Malaysia yang menetap di negara ini.

Menjawab soalan dalam sesi dialog selepas itu, Anwar berkata, cabaran utama dalam melaksanakan konsep Malaysia MADANI ialah aspek ekonomi.

"Dalam hal ini, perniagaan mesti maju, kita kena teroka bidang baharu dan mesti ada nilai serta ihsan. Saya rumuskan idea baharu dan cerakinkan supaya rakyat faham untuk memastikan pelaksanaannya kelak lebih lancar," katanya.

Mengimbau perjuangan 40 tahunnya dalam politik sebelum berada di kedudukan sekarang, Perdana Menteri secara terbuka menyatakan tidak menyimpan dendam terhadap apa yang berlaku.

Pelbagai pendedahan di pentas antarabangsa menerusi kedudukan dalam kerajaan satu waktu dulu, tegasnya, banyak dijadikan sandaran dalam memperkenalkan pembaharuan ketika ini.

"Apa makna saya pegang jawatan di peringkat antarabangsa kalau saya tak boleh angkat darjat rakyat?"

"Kita nak bawa perubahan, ubah pemikiran masyarakat. Kita mahu melawan fahaman berkaitan perkauman. Islam tidak boleh dijadikan bibit pergaduhan, maka saya ingin bawa kembali nilainya.

"Jangan jadikan Islam untuk menghina orang, pecah-belahkan masyarakat. Kita mesti melawat trend konservatif baharu yang mulai menular, lawan rasuah. Anda fikir ia mudah? Tidak.

"Kita kena yakin untuk menghadapi masalah, tetapi alhamdulillah, saya dah jadi Perdana Menteri, rakan-rakan dalam pasukan beri sokongan kuat. Dulu orang ingat kerajaan ini rapuh, tapi kini semakin kuat dengan 148 kerusi. Jadi buatlah kerja," katanya.